

Dann käm er gut mit'nanner aus

E Gockel kräht, das is bekannt,
in aller Herrgottsfrieh.
Un frieher hat mer uff em Land
sei helles Kik'riki
an jedem Eck geheert
- un nimand hat's gesteert!

Im Dorf gäbt's heit nur noch ä Hah',
der duht getreu sei Pflicht.
Doch das missfällt 'rer Nachbersfraa:
's geht bis vor's Amtsgericht.

Der Hah' soll krähe erscht no acht
un so, dass mer's net heert,
weil der Radau die Rockmusik
vum Radiowecker steert.

E Frosch, der quakt sei Liebeslied
voll Luscht aus vollem Hals.
A nachts, do wird der Borsch net mied.
Un frieh'r de Dorfteich als,
der war mit Grotte voll
- un nimand hat gescholl!

Wann heit emol im Gaadeteich
e Frosch die Backe bleeht,
wer'n von de Nachbersleit sogleich
Prodeschde eigeleet.

Zum Glick gäbt's Flicher in de Palz,
die machen so viel Krach,
dass mer die Quäker nimmi heert:
Das is e feini Sach!

Günter Mannweiler

